

天一閣藏明代方志選刊

天一閣藏明代方志選刊

宿州志

嘉靖宿州志

一九六三年十二月上海古
籍書店據寧波天一閣藏明
嘉靖刻本景印原書版框高
二一·〇公分寬一四·九公分

宿州志卷之一

地里志

按地有郡邑而沿革異名有疆域而廣袤不一有風俗而升降不同有山川而形勝斯見有土

田以養民有坊鄉以聚民匪志則無所考故類其事而通志焉

沿革

繫星野畧

宿州

禹貢徐州之域魯地天文圭婁分野降婁之次

周屬青州春秋時宋地

莊公十年宋人

遷宿移入封內以後屬楚秦始為縣隸泗州漢改為沛郡為附庸始國于此

東漢為沛國

漢興四年改泗水為沛郡遷治相今州之西北相城鄉乃沛郡治沛縣號小沛三國

為魏梁為睢州北齊置睢南郡

舊志云北齊為仁州誤也

隋開皇初郡

廢地屬彭城郡唐元和四年置宿州太和三年州廢七年

復置初治虹徒屬河南道領符離臨渙咸通四年置宿泗新虹四縣

等州都團練觀察處置使治于宿宋建隆元年陞為防禦

開寶五年建為靖軍節度屬淮南路熙寧五年分屬淮南

東路元祐七年陞虹之靈壁鎮為屬縣舊志云元豐間建

炎後州沒于金紹興元年偽齊劉豫置十年都統制王德

收復及楊沂中師潰于宿金人遂屠其城貞祐三年仍為

保靖軍節度元仍為州隸河南歸德府領臨渙蘄符至元

三年以臨渙蘄符離三縣併入州四年改靈壁屬泗州十

三年以虹屬宿十七年改虹屬泗靈壁仍屬宿至正末為

張士誠所據

國朝兵至取之洪武初以州隸臨濠府即鳳陽府仍領靈璧縣
編戶五十一里今增為七十里

靈璧縣

星野與
州同

周職方為青州春秋為徐子國地吳滅徐為

宋地後為楚邊境漢為虹縣地

漢志古之夏
丘邑地也

晉屬睢州宋

劉裕屬泗州隋屬虹縣唐為零壁鎮宋元祐七年陞為縣

屬宿州政和中改零壁為靈璧後金宋交爭居民流散城

郭為墟元至元間復立縣屬泗州十七年仍屬宿州隸河

南歸德府元末為張士誠所據丙子歸附

國朝仍屬宿州編戶三十八里今增為四十里

郡名

宿州

名始佳陽以睢水名于唐睢陽非唐睢陽

甬上

漢築甬道漢書云甬者道上加土也

靈璧縣

地產磬石故名唐為零壁鎮宋陞為縣改零為靈

疆域

宿州

在鳳陽府治北二百三十三里廣一百六十里袤一百七十里

東至靈璧縣界徐園鋪

六十里

西至永城縣界新安鋪

一百里

南至懷遠縣界肥河十八

里

北至蕭縣界胡辛庄

九十里

東到靈璧縣

一百二十里

西到永

城縣

一百四十里

南到懷遠縣

一百七十里

北到徐州

一百八十五里

東南

到臨淮縣二百三十三里西南到蒙城縣一百二十里東北到邳州二百

二十里西北到蕭縣一百五十里南到南京陸路五百七十里北

到北京陸路一千七百七十里

靈璧縣在州治東一百二十里廣東至虹縣界河北三十里西

至宿州界大店六十里南至五河縣界潼河一百四十里北至徐

州界雙溝一百四十里東到虹縣六十里西到宿州一百二十里南到

臨淮縣一百八十里北到徐州一百八十里東南到五河縣一百二十里

西南到懷遠縣一百八十里東北到睢寧縣一百五十里西北到蕭

縣二百二十里南到南京陸路五百二十七里北到北京陸路一千

八百八十三里水路
二千三百一十里

風俗

宿州土曠民稀勤于耕種牧養蚕績乃其常業

古志

喜問學

從教化雖兵革之餘猶有是心

元志

士勤問學民務農商

有淳厚之風禮讓之俗

中都志

地闢民聚風淳俗美發身

於庠序者雖未嘗乏其人而質朴少文者居多

編修宋應奎撰進士

題名記

靈璧民性朴直而尚儉素

古志

民直遂而易導化士氣節而

薄委靡

同前

士人好學黎庶勤耕嫁娶相資患難相恤有

太古之遺風

中都志

接宿與靈璧之俗其無變於諸志所云者如民尚儉嗇而以力本務農為業士尚名節而以枉己徇人為恥縣固猶夫州也然婦女不事蚕織富家大族多白丁見利忘害信巫諂神所謂淳厚之風禮讓之俗不無漸衰州亦猶夫縣也惟轉移化導之機君子有焉若曰水土異齊而風俗不可同則非予之所敢知

形勝

宿州群峯疊聳於西北平野綿亘於東南地連徐豫之境路

當淮泗之衝

中都志

豐山障其後漕河繞其前右接徐豫

左攬江淮郊原衍曠陸路平夷

舊志

宿為南畿大州境徐

豫而控江淮

侍講周洪謨修廟學記

枕豐山帶睢河憑邳控徐跨汴

阻淮信江北一要地也新增

靈璧東西陵谷周旋南北山河環繞舟楫通淮泗車馬達青

徐中都志北枕磬山南橫汴水左跨鹿鳴右峙鳳儀山則

幅幘水則旋繞舊志黃流西來南有磬石淮水東馳北有

靈璧元監邑去思碑銘鳳凰磬石盤峙前後汴睢渙漕縈繞左右

山明水秀地靈人傑監丞閻禹錫撰科第題名記

山川

宿州名山二大河一

相山在州西北九十里相城鄉山頂有顯濟王廟古碑云相山巍巍盤紆穹崇

上應房心與天靈冲

打鼓山

在州北三十里

元揭傒斯劉氏望先樓記云彭城南百餘

里有三峯倚天名曰鼓山山中有聲如鼓自鳴歲則大熟

東北有二泉可溉田數十畝

睢河

在州北二十里

源出河南夏邑白河東流中經州之符離通

宿遷至清河會泗入淮漢地里志睢水首受浪蕩水東至取慮入泗俗呼為符離河有石橋跨河南北

國朝弘治初河水四決支流衍漫事

聞詔少司徒白公昂治

之乃為月河於符離橋之南以殺水勢嘉靖丙申巡按御

史蘇公祐命州司造浮橋於月河以睢水復決行者病涉故也

符離橋月河記

侍講學士長沙李東陽撰

宿州符離月河者戶部左

侍郎白公所闢以殺河勢者也蓋自弘治二年秋河決

原武支流為三其一決封丘金龍漫于祥符長垣下曹

濮衝張秋長堤其一出中年下尉氏其一汎濫于蘭陽

儀封考城歸德以至宿瀕行四出不繇故道禾盡沒民

溺死者甚衆守臣聞于朝詔廷臣舉可任茲責者公

自南京兵部改命茲職復舉兵部郎中婁君性于南京



會旱宿遷諮議既協徧視原隰得廢渠于小河口東與
泗接詢諸耆民咸曰引汴而通之則河勢可殺退而稽
據典籍得之書曰澠沮會同傳曰澠即汴沮即睢今睢
尚名州而宿有睢陽驛淮亦有睢寧縣則知小河之為
睢也遂浚而西抵歸德飲馬池諸口以受汴中經符離
橋見其庠不能穡舟且水為所泥故橫不可制乃為月
河于橋南禹廟之下長五百丈廣十丈深二丈五尺既
又以河勢多曲徑其折而疏之為月河者十有五為丈
殆萬餘又緣河為堤七百里塞決口三十六由是汴入

睢睢入泗泗入淮以達于海復古故道凡河之費取于
邊儲之價及有司之藏夫取于旁近州衛之籍而是河
也用銀五百兩夫三千五百人工始于三年五月至八
月望而成嗚乎河之為患自古有之漢以後決無常時
治法亦異蓋有塞有浚有疏而疏之說勝

國朝凡四決後為都御史徐公有貞治之有撓其議者曰不
能塞河而顧開之邪使者至徐出示二壺一竅五竅者
各一注而瀉之則五竅者先涸使歸而議決此白公之
所親聞者也金龍之決山東以為憂而河南復慮其塞

兩議之弗定亦久矣白公既從塞議於是倍增汴堤又
疏其下流如所謂月河者故兩省之民咸宜之疏之効
亦明甚矣哉

靈璧縣

名山五
大河二

磬石山

在縣北七十里
山出磬石故名

書曰泗濱浮磬文獻通考磬石山

在泗州玉海註云下邳有石磬山古取磬之地按靈璧春
秋屬徐子國地即泗地東漢下邳郡地唐以來為泗州地
宋元祐七年始置縣磬石山北距泗水六十里許故書謂
之泗濱通考謂在泗州玉海謂在下邳也